





51739/p

T 34

L. xvi Qui.

DE USU CORTICIS PERUVIANI

IN PURULENTÆ MATERIÆ COLLECTIONIBUS

# DISSERTATIO

PRO SOLUTIONE PROBLEMATIS

AB REGIA SCIENTIARUM ET LITTERARUM

ACADEMIA MANTUANA

*Propositi ad Annum 1777.*

A CAJETANO TORRACA

PHILOSOPHIÆ AC MEDICINÆ DOCTORE,

*Et in Centumcellarum Urbe*

MEDICO PRIMARIO, EXHIBITA,

AB EADEMQUE ACADEMIA

TERTIO LOCO PROBATA.



MANTUÆ MDCCLXXIX.



Typis Hæredis Alberti Pazzoni, Regio-Ducalis Typographi.

SUPERIORUM FACULTATE.



Digitized by the Internet Archive  
in 2018 with funding from  
Wellcome Library


<https://archive.org/details/b30386354>

*Exerceto circa morbos duo:  
Ut iuves; aut non noceas.*

Hipp. Epid. Lib. I. sect. 2. constit. temp. 2.

A R T I C U L U S I.

*Præloquium.*

ertior factus Medicus collectionem adesse puris in aliqua corporis parte, uti Peruviano Cortice debet. Innotescat puris indoles, & quos valeat horridos producere effectus; innotescat vis Peruviani Corticis quanta sit ad pravam puris indolem moderandam, ejusque arcendos effectus, compescendosve: tuncque erit demonstratum, quod affirmative proposuimus in obsequium celeberrimæ Regalis Mantuanæ Academiæ. Verum iis deficientibus, vel non opportune comparatis notionibus, quid sane pronunciari possit, quod adprobationem mereatur? Eæ autem notiones ex observationibus, experimentisque desumendæ; non ex speculationibus. Speculandum vero circa observationes, & ratiocinandum super experimenta, ut quæ inde ad Medicam praxim reducenda sunt, cuidam regulæ, atque methodo subjici possint (1).

a 2

A R-

(1) Hipp. Præceptiones. A. Corn. Cels. Lib. I. præfat.



## ARTICULUS II.

*Quid pus.*

I. **P**US ex animali est substantia. *Ex carne pus; purulentum ex sanguine* fieri observaverat, dixeratque Hippocrates (2). Carnium, carnosarumque partium corruptionem, & permutationem definire placuit *Abscessum* Paulo Æginetæ (3). Verum integra animalis Corporis œconomia pus nullum admittit.

II. Quin imo non efficitur pus, nisi in morbosa Corporis dispositione: atque solent ut plurimum concomitari febris, & dolor (4); sanguis diu in vasis remorans, seu in quavis cavitate coactus, dissolvitur tandem in *purulentum* liquidum, quod continentia solida penetrans, dissolvit quoque, atque cum eo hæc simul in pus degenerant. Nempe partes elementares sanguinis, seu globuli sint, seu fibrillæ (5), a mutuo nexu secedunt; acre alchalinum volatile sal, seu putridum dissolvens miasma exaltatur, quod gluten, quo solidorum fibræ cohærent, destruens, has disjunctas atterit, fu-

(2) Lib. de Alimentis. Galen. Com. 2. Aphorism. 47.

(3) Lib. IV. c. 18. Boher. de absc. Wansv. com. ad eundem.

(4) Hipp. Aph. 47. sect. 2. Præter naturam putrescere animalem substantiam affirmavit & Galen. c. 6. Lib. V. de simpl. medic. facult., & alibi.

(5) Ex fibris sanguinem conflare dixit Hipp. seu Auctor Lib. de carnibus. Galen. de Elem. Lib. II. Fernel. de sang. nat. Lib. VI. c. 7. Videatur summus Hallerus Physiol. de sanguine &c. Postremo cl. Hier. David. Gaubius Pathol. &c., fibras, cruorem, serum asseruit tria esse sanguinis Elementa. Fibrarum opinio non aspernanda videtur. Communior sententia stat pro globulis. Annulos existimat sanguinis particulas cl. Adurre. Ast fibrillæ raptæ in rapidissimum per cylindros motum nonne possunt in orbiculos figurari, & simulare globulos, annulosve? Sed de quæstione hac non opportunus hic sermo.



subigitque, inque substantiam albescentem, spissam, glutinosam convertit, quæ dicitur pus.

III. Revera in putrefactionibus primum generatim dissolvi cruorem, quam serum probavit suis experimentis etiam cl. Pringle (6); atque idem existimat sal alchali aliud esse a miasmate illo putrido solvente, & exhalante ab ipsis jam putridis carnibus (7). Verum accepta est notio illa, qua alchalescere dicuntur substantiæ animales, cum putrescunt.

### A R T I C U L U S III.

*Quibus causis pus efformetur.*

IV. **A** St sanguis diu etiam restitans non semper in purulentum decomponitur liquidum. In ventriculis, auriculisque cordis, in aneurismatibus, in utero, &c., remorans sanguis congeritur in polyposas concretiones, quæ intactæ per longum nimis temporis spatium, partium additione excrescunt potius, & in durissimas albas substantias sæpe abeunt. Alia igitur necesse est causa accedat, ut stagnans cruor in purulentum transeat. Aliunde coactus extra quidem vasa cruor putrescit calore etiam graduum 50., ac minori: cum præsertim libere aer, circum undique penetrans, degenerationi huic promovendæ coopertur (8). Hæc autem liberi aeris cooperatio deest pro

a 3

de-

---

(6) Loc. cit. memor. 7.

(7) In exper. de septicis substantiis. Sal volatile oleosum sanguini recens educto mixtum destruit, seu dissolvit globulos quamcitissime. Vid. Huxham essais on fevers. cap. 5. of the dissolved, and putrid state of blood pag. 46. ex Leeuwenhoek.

(8) Haller Physiol. Lib. V. sect. 2. §. 7.



degeneratione sanguinis in purulentam materiam, seu in putridam substantiam, cum intra vasa obstruens remoratur. Exploditur vero aer contentus statim ac sanguis æque ac solidæ partes putrescunt quovis modo, ita ut putrefactionem sequatur immediate aeris explosio.

V. Itaque congestus in vasculis sanguis efficitur purulentus accedente forsan, seu exaltato *phlogisto*. Suppuratio revera sequitur inflammationem (9). „ Inflammatur ulcera tunc cum ad suppurationem tendunt; suppurantur autem alterato sanguine, & calesfacto, donec putrefactus talium ulcerum pus fiat. „ Hæc docuit Hippocrates *de ulcer.*

VI. Inflammatio præcedens non discussa, non resoluta dat suppurationi occasionem (10). Etenim citatior fit cordis motus, quo major obstructorum vasculorum est numerus, major proinde resistentia. Exinde urgente continuo liquido vitali in obstructa vasa, ejusdem sanguinis, qui jam diu coactus est, jugiterque percussus, atque excitatis moto aucto phlogisticis moleculis penetratus, tandem particulae a cohesionem secedunt mutua, atque urgente eo magis a tergo motus impetu illud denique *purulentum* efformatur: scilicet sejunctæ omnino particulae a cohesionem, in fluidius liquidum laxiusque convertuntur, aere *evolante*, & volatili illo putridifero vapore, seu alchalino sale e compedibus solutis.

VII. Penetrans inde hoc *purulentum* continentium  
so-

(9) Hipp. de ulceribus vers. mihi 20. edit. Venet. noviss.

(10) Vid. Boheraav. aph. de cogn. & cur. morbis §. 387., & Comm. Wansv. ad §. 402.



solidorum fibras, has item a nexu, quo firmæ sunt, separat, emollit, destruit, atque in *pus* convertit. Re ipsa quo partes solidæ laxiores sunt, facilius putrefiunt; admittunt nempe promptius subtile putridum dissolvens inter laxæ cohesionis fibras (11). Ideoque cum nexus particularum sanguinis nimis compactus est, & solidarum cohesio partium adeo valens, ut rigiditatem constituent, tunc suppurationi resistitur diu: ac si suppuratio, ut sæpe evenit, pro abolendis inflammatione, tumore, &c., necessaria existimetur, subveniendum tum porro est remediis, quæ maturantia dicuntur, quæ nimirum emolliant, laxent, transpiratum impedian, atque etiam stimulando calorem adaugeant (12).

VIII. Quod si vis vitæ, motum liquidorum sustinens, accelerans deficiat, vel langueat, nullum & *pus* generabitur (13). Putrescent quippe in cadaveribus carnes, & sanguis: sed tum pro solvente ab omni cohesione particularum elementarium accedit nedum atmospheræ calor, sed & aer ipse exterior. Internus quoque nitens aer perpetuo contra compedes, resistantiam cohesionis superans (vitæ causis emortuis), elementares ipsas particulas, fibrasque sejungit, &c.

IX. At certe pro suppuratione motus requiritur, calorque major in vitali fluido, quam qui in sanitatis statu esse debeat. Illudque pro Corporum œcono-

a 4

mia

(11) Pringle exp. l. c.

(12) Et veteribus id notum fuit. Celsus Lib. V. cap. 18. exhibet talia sub numeris 9. 10. 11. Vid. Boerh., ejusque laudatissimum Comm. Wansv. ad §. 403.

(13) Wansv. ib.



mia æterna Providentia sapientissime disposuit, ut motus quidem liquidorum æqualis, quo sanitas conservatur, puris, putredinisque præternaturalem generationem prohibeat: eo etenim compinguntur invicem elementares partes, impediturque earum discessus a mutua cohesione, internusque aer, aliaque volatilia elementa iis vinculis cohercentur (14). Et licet tendentia vitalis liquidi per vasa circumducti ad putredinosam aerimoniam, seu potius ad putridam dissolutionem vigent continuo; illa tamen reparatur & perpetuo assumptis alimentis, iisque præfertim accrescentibus (15). Celerior autem motus, atque celerimus tendentiam ad dissolutionem urgendo adauget: idque perpetua observatio, ipsaque ex physiologicis ratio docent.

X. Itaque seu mechanica motus adaucti actione, seu excitato per motum phlogisto, seu potius utraque concurrente causa, sanguis in vasis remorans tandem purulentus efficitur. Hoc *purulentum* Hippocratis ex *sanguine*, *pus* ex carnibus procreat: elementares nempe solidorum fibras penetrando, a cohesione solvendo, vincula aeri, aliisque volatilibus elementis destruendo. Hæc eadem valet item operari efficacissimum volatile illud putridiferum, quod ex putri jam Corpore exhalat, intus ab extra susceptum, expostamque dissolutionem fluidorum, solidorumque promptissime promovens.

A R-

---

(14) Haller ib. Lib. VI. sect. 3. §. 14.

(15) Huxham l. c. p. 56.



## ARTICULUS IV.

*Malæ puris qualitates.*

XI. **U**bi motus liquidorum in inflammata vasa & obstructa urgentium sit æquo violentior, tunc ipsum pus putrescit (16), atque indolis efficitur pessimæ, acrius nempe, tenuius, penetrantiusque, gangraenosum, fœtidum, quod certe horribilem quandoque virulentiam acquirere valet. Atque hæc pessima puris indoles, quantumvis a qualitatibus præexistentibus sanguinis repetatur ut plurimum, aut a venenoso putrido miasmate volatili ab extra suscepto; tamen ab intentiori putrefactionis gradu deducenda non semel vere est.

XII. Characteres boni puris perpetua observatione notantur iidem, quos animadverterat Hippocrates (17): esse enim debet *album, æquale, leve, & quamminimùm graveolens*. Quod vero huic contrarium, *pessimum*. In quem Hippocratis locum, Galenus generationem boni puris succedere asserit naturæ viribus secundum naturam vigentibus. Itaque docemur observatione, quod (I.) sine prævia restitancia sanguinis, sine concomitante phlogistica dispositione, & motu accelerato nullum efformatur pus; (II.) quod commendabile pus producitur valentibus secundum naturam vitæ viribus, motu quidem accelerato, sed haud nimium; (III.) quod denique pus acquirit qualitatem plus, minusve virulen-

(16) Notavit & Galenus Comm. 5. aph. 15.

(17) Hipp. in prognost. sent. 42., & ex Hippocr. Galenus Comment. 1. progn. 1., & de differ. febr. 1.



lentam, quo violentior, diuturniorque calor, motusve urgeant: quæ tamen virulentia augeri quidem potest, si externus fomes virulentus præcesserit; si præextiterit acris liquidorum intemperies.

XIII. Quæ usque nunc adnotavimus probant præcipue pus, quod *ex animalis substantia est*, putridæ esse, seu, juxta receptam notionem, alchalinæ naturæ. Id poterit & experimento evinci, miscendo acida, præsertim vitriolica puri recenti, quod colorem permutat ex albo aut cinereo in subatrum, aut certe obscurum. Urinæ multo foetido pure saturatæ aquam thermalem martis vitriolo blande acidulam commiscui: vidi mox cinereum immutari colorem, & post aliquot horas in atramentum fere converti.

XIV. Ubi album, densum, æquale, leve, & minime graveolens est pus, minus quidem extricatur ex eo salis volatilis acris, putridiferi; plurimum vero, cum tenuius est, obscurius, foetidius: quas porro qualitates deteriores etiam bonum pus acquireret, si in *cavitate clausa* calida diutius contineatur (18).

XV. Ceterum puris productio pari ferme passu procedit, ut ipsa humorum putredo: quod nulli locum dubio admittit, & Galenus ipse jam scripserat (19). *Putredo autem (inquit) humorum, quæ fit in vasis, similis est illi, quæ fit in inflammationibus, & abscessibus, & aliis tuberculis.*

XVI. Ast probata quantumvis, & innegabilis sit  
 pu-

(18) Vid. W. Sviect. in Comment. ad Boerhav. de abscessu §. 387.

(19) Galen. de febr. Lib. I. cap. 7. & 8.



putrida alchalina puris natura (20), non inficiandum tamen est, quandoque acidam præferre indolem, cum præsertim Corpus acida peccat intemperie. Hoc evenit potissimum infantibus lacte enutritis, in quibus acescentia prævalet. In iis crusta lactea aciditatis notas exhibet patentissimas, cum præsertim multo albo pure scateat. Ipsa lactantium transpiratio acorem exhibet sentiendum. Nec rarissime in adultis quoque aciditas dominatur. Pus aliquando acescere, Hallero referente, in pectore notatum est. Latet revera & in sanguine acor: unde in liquidi vitalis decompositione potest se exerere, & manifestari acidum, seu, ut hippocratica phrasi loquar, conspicuum fieri (21). „ Verum non perinde constans est, ut alchalina de- „ generatio: diuturniori quippe evolutione sua in „ putredinem totus evanescit (22). „

## A R T I C U L U S V.

*Horridi purulentæ materiæ effectus.*

XVII. **E** Volat porro ex deteriori, & ichoroso pure  
 fal acerrimus, qui exitiales quandoque effectus  
 producere aptus est. Horum aliquos recensuit  
 Illūmus, doctissimusque Hallerus. „ Vapor destillati  
 „ de pestilenti bubone *puris*, quasi fulminis ictu ma-  
 „ le curiosum Medicum prostravit. A gustatione te-  
 „ meraria ichoris exudantis a cancro mammæ Chirur-  
 „ gus

(20) Haller. Physiol. Lib. V. sect. 2. §. 8. not. 1.

(21) Hippocr. de vet. medic. num. 47.

(22) Hall. Physiol. Lib. V. sect. 2. §. 32.



„ gus contraxit fœtorem teterrimum in ore usque ad  
 „ mortem, quæ ex hoc ipso contagio sequuta est.  
 „ Ex solo canceri mammam Uxoris erodentis odore  
 „ interemptus dicitur Franciscus Bellingerus. Ægro-  
 „ tarunt omnes, qui Valsalvæ abscessum hæpatis ape-  
 „ rienti adstiterunt (23). „

XVIII. Sed & inter quam plurima, quæ adduci hic possent exempla, habeo inter amicos Chirurgum, qui multis ab hinc annis post navalem conflictum plurimum vulnera Turcarum ampla tractare coactus, ex halitibus copiosissimi puris, quod ex iisdem vulneribus educabatur, febrim denique contraxit fere pestilentem, a qua licet post plurimos convaluerit dies, tamen diu nimis languens vixit; bene se habuit postea; sed & variis infectionis notis, aliisque accedentibus causis, tandem convulsionibus afflictus efferis revertentibus sæpe, & caput præcipue extorquentibus, miseram ducit adhuc quinto circiter ab hinc anno vitam.

XIX. Sed hæc notissima sunt. De ulceribus, abscessibusque internis permeans resorptus per venulas ubique virulentus ille vapor, ipsumque pus, totum valet sensim sine sensu sanguinem putrefacere: nexum quippe particularum componentium destruit, & in putridum liquorem convertit; & in solida penetrans fundit & nutritium illud gluten, quo elementares stant fibræ; omnia etiam per illud magis coagulabilia liquantur, cruor, ovi albumen ipsum, & ipsum amnii liquamen, & adeps (24). Exinde contagia illa

non

---

(23) Hall. Physiol. Lib. 5. sect. 2. ex variis Auctoribus.

(24) Vid. quæ ex Navier sur les amollissements des os refert Hallerus l. c.



non semel irreparabilia ex tabidis caussa abscessuum seu pulmonis, seu hæpatis, seu visceris cujuslibet.

## A R T I C U L U S VI.

*Quæ puri obsistant remedia.*

XX. **V**irulentam vero, adeoque exitialem puris illam alchalinam, seu putridam naturam, quæ effectus plus minus horrendos efficax est producere, quod, quale remedium moderabitur? Antisepticorum certe magna recensetur copia in materia Medica: ultra enim sales, spiritusque fermentatos, multæ etiam refinæ, & adstringentia antisepticorum numero adscribuntur (25).

XXI. Ac quod ad adstringentia pertinet, licet possint quidem ut antiseptica æstimari, coagulationem potius fibrarum sanguinisque operantur, quam valeant veram illam substinere cohaesionem elementarium mutuam partium, organicamque: cum tamen pleraque antiseptica adstringentium effectus minime edant (26), quod optandum est. Acida sic vegetabilia, & præsertim mineralia putredinem avertere, & pus jam efformatum vincere possunt. Id potissimum observatum est obtineri ab Oleo Vitrioli. Acor mineralis ut validissimum remedium prædicatur ab Hallero: hoc eodem remedio peritissimi Practici, & ipse sapiens Sydenamius (27) variolas pessimas superarunt. In vario-

---

(25) Vid. exper. doctissimi Pringle mem. 3. exp. 11.

(26) Id. mem. 3.

(27) Op. med. pluribus in locis.



riolis anomalis præcipue nigris asserit hic Auctor ingentis usus esse Spiritum Vitrioli. Attamen loquens de mineralibus remediis potentius respondere judicat indicationibus; numquam vero *specificè* (28).

XXII. Acidularum thermalium, quæ Vitriolo Martis animatæ sunt, experientia multiplici probatus est usus in abscessibus uteri, hæpatis, renumque. Sed & gratissimus Limonum succus, atque Aurantium, aqua dilutus efficacissime putredini resistit, eoque large exhibito variolas confluentissimas æstivo præsertim tempore sanatas fuisse sæpiissime expertus asserere non dubito: utor quippe largiter in suppuratis variolis, & in qualibet putrida, scorbuticave affectione.

XXIII. Ast acidorum, fortium præcipue, vis ad illud potissimum videtur dirigi, ut quasi luctam agendo in putrida, seu alchalisata liquida, hæc vel moderetur, ut minus lædant; vel in neutram subigat naturam; vel superet ita, ut acidum ipsum prævaleat. Ex his varia animali œconomia possunt incommoda quandoque evenire. Purulenta non semel, aut putrida cacochimia adeo late Corpus animale possidet, ut nulla ab acidis quibuscumque moderatio obtineatur. Quod si acidorum, etiam valentiorum consideremus in solida actionem, ipsa ab illis corrugari quidem possunt; sed corrugationem major inde sequitur debilitas, laxitasque statim ac præsentia acidi deest.

XXIV. Quæ tamen dum animadverto, minime cen-  
seo esse acida in medendo animale putridum excludenda.



da. Valent enim mirimode ad alchalescentiam ipsam frænandam, atque sine ipsis manca meo indicio esset Medicina. Viam sternere mihi in animo erat ad ostendendam majorem, tutioremque Peruviani Corticis efficaciam, ubi subigenda non solum sit putrida exaltatio liquidorum, & purulenta cacochimia corrigenda; verum solida ipsa substinenda sint, ne a dissolvante purulento miasmate destruantur penitus.

## A R T I C U L U S VII.

*Cortex Peruvianus puris caussis obsistit, atque effectibus.*

XXV. **D**E Peruviano Cortice non audeam pronunciare, quo Sale, quo Oleo, quo tandem Spiritu putredinem, & pus avertat, corrigat, ejusque diffusionem prohibeat: non enim de Chemica ejus analysi loquar, cum vix discrepet ab alia vegetabilis cujuslibet. Illius cineres a cineribus vegetabilium fere omnium non differunt: & magnes non quidem confertissimas, sed aliquot attrahere de ejus cinere observatur moleculas, quæ ferri existimari debent: ut de aliorum vegetabilium cineribus plus minusve attrahit.

XXVI. De Cortice pro præsentî quæstione nihil proferendum est, nisi quod certum experientia docuit, & monstravit perpetua observatio. Sed certum experientia, & observatione demonstrantibus, & continuo verum est Chinam Chinam animalia liquida, & carnes a putrefactione defendere; putrefactionem sistere, quæ incæperat; ideoque diffusionem putredinis cohibere. Ad nauseam fortasse repeterem hoc loco,



co, quæ jam nota de antiseptica Corticis vi experti sunt currenti sæculo, & paucis ab hinc annis viri clarissimi (29), eaque non pauca, qualia sint, sed certe fidelia, quæ ipse ad summum immortalis memoriæ Morgagnum in meo Specimine inscripsi (30).

XXVII. Sed & hoc proposito aliquot tentavi experimenta circa recens pus. Eductum hoc de externo mammæ abscessu, quod indolis erat deterioris, subobscurum nempe, fœtidum, in binas æquales partes divisum detinui 24. horarum spatio duobus in vasculis. Iphis observandum erat oculis in puris portione, cui Cortex Peruvianus immiscebatur, idem pus crassius fieri, & vix fœtorem amplius reddere, colore autem mixtum esse de ipso pulvere; in qua autem portione nihil additum erat, iisdem in circumstantiis loci, caloris, durationis &c., pus reddi ichorosum, atrum, liquidius, & fœtidissimum.

XXVIII. Quin igitur repetantur observata, & experimenta, quæ certa habemus de antiseptica Corticis virtute; liceat super hæc data aliquam struere conjecturam, qua Chinæ Chinæ effectus iidem explicentur accommodatissime. Agere primum videtur Cortex Peruvianus in chilificationis potissimum officina, gastricis primo succis talem conferendo temperiem, qualis apta est laudabilem parare chylum, cujus scilicet elementares particule cohæsionem invicem habeant *procul*

(29) Inter quos memoro laudatum jam Pringle &c., memor. præsertim 11. exp. 13., & Huxham l. c. plurib. loc., Mead cap. 3. de variolarum curat. &c. &c.

(30) Specimen observationum, atq. experimentorum, quibus Peruviani Corticis vis antiseptica &c. &c.



*cul a coagulatione* proximiorē. Similem & in fibris solidis effectum tum ventriculi, tum tenuium intestinorum producere videtur, quas præsētia putridi, aut purulenta cacochimia laxiores quidem semper reddunt. Viribus inde vitæ commissus nutritius liquor, *Corticis medio ita paratus, correctusve*, in sanguinem convertitur, qui solida enutriendo, aptus est idoneum cohesionis gluten fibris applicare elementaribus, easque reparare: unde & sanguis ipse, & solidæ fibræ *dissolventi volatili putrido, & purulento ex sanguine* resistent.

XXIX. Quævis porro experimenta ad animalium substantiarum a putredine præservationem Cortice Peruviano tentata, seu ad illas jam putrescentes reparandas, illud exhibuerunt adnotandum, quod fibræ ad *strictiorem contactum* applicitæ fuerunt illæsa organica textura.

XXX. Hæc autem efficienda a Cortice, non quidem expectari debent ab una ejus remedii applicatione. Diu enim continuari debet, & repetitis sæpe dosibus, licet parvis, remedium hoc, ut dicendum infra. Hæc sane operando Peruvianus Cortex præveniet non solum putridam dissolutionem, seu purulentam, sed & inchoatam sistet: approximando siquidem sua intermixtione elementares liquidorum, solidorumque partes, quas dissolvens *purulentum, putridumve* miasma sejungere, atque ita destruere efficax est. Longo, diuturnoque igitur Corticis usu in naturali organicaque conformatione possunt fluida, solidaque substineri, ad eamque reduci; cohiberi putrida dissolutio; atque purulenta cacochimia superari. Hoc sensu existimo ip-



sum Corticem validissimum esse antisepticum, & puris resistere causis, & effectibus. Non vero, quod purulentum, putridumve dissolvens, ut acida, lucta oppugnet destruatque; neque quod suppurationum primitivas causas auferat.

XXXI. Cur autem hæc operando Cortex Peruvianus non valeat similiter in iis morbis, ubi effusiones contingunt liquidorum, ipsiusque sanguinis? Valet procul dubio (31), cum putridum solvens laxitatem in fibris elementaribus produxerit, & laxitatem cruori, unde illarum ægritudinum hæc causa sit: eoque vel tutius, si Cortici quandoque aliquid addatur anodini, quo irritabilitas, sensibilitasque intestinalium fibrarum auctæ minuantur. Verum minime proficius est, imo & noxius non semel, quod serio advertendum, quando rigiditas, nimiaque vis liquidorum solidorumque morbos illos procreet.

## A R T I C U L U S VIII.

*Comprobatur observationibus in morbis ex pure,  
Cortice superatis.*

XXXII. **A** St nulla aptior, concludentiorque adduci potest ratio, ut summa comprobetur Chinæ Chinæ efficacia in morbis purulentis, atque in puris collectionibus, quam quæ ex observatione, & successibus faustis in iisdem circumstantiis petatur.

Ope-

---

(31) In diabete quidem, sudoribus colliquativis, febribus dysentericis autumnalibus, hæmorrhagiis a fundente putrido &c., probatæ efficaciæ est antisepticus Cortex: quod sæpissime expertus assero.



Operæ hinc pretium duxi paucas subungere morborum, de quibus quæstio est, historias, quosque remedium nostrum sanavit.

Ipsis meæ praxeos medicæ exordiis tractavi non paucos pulmonum abscessibus, atque inchoata tabe quasi perditos, consumptosque, quos ad laudabilem valetudinis statum resurgere observavi usu potissimum Corticis Peruviani, parca quidem dosi, sed diu nimis exhibiti: atque illorum aliqui talem denique adepti sunt sanitatem, qua valuerunt sibi victum laboribus comparare; de aliorum vero, ut scribendi sinceritas eluceat, in sanitate perseverantia nihil audeo pronunciare, cum de ipsis sciscitari opportunitas mihi data minime fuerit in posterum.

XXXIII. Ab illo autem tempore usque ad præsens, ubi mihi necessitas fuit in puris collectionibus pulmonaribus Corticem adhibendi; exhibui tutius sub pilulari forma, syrupis ut vocant pectoralibus miscendo Corticem pulverisatum, & addito quandoque glycirizæ pulvere, aut alio pro re apto remedio; pilulisque superbibendam exhibebam potionem similiter opportunam; animadvertēbam denique abfuisse omnem inflammationem. Vomitis & pulmonaribus apertis, atque in empiematibus, tunc cum hi morbi diuturniores redditi purulentam cacochimiam efformare incæperunt, non sine sensibili beneficio usus non raro sum Peruviano Cortice: fateor tamen non semper superatos fuisse eos morbos, & a remedio abstinui, cum læsiones organicas, erosionesque profundas arbitrabar adfuisse.



XXXIV. Ampla in perinæo suppuratio contigerat rustico cuidam juveni, quæ serpens cuniculos effodiebat per inguinum alterutrum ad usque pubem. Constitit denique profunde in ipso perinæo, in quo cœperat, ibique depascebatur alte vicinas partes, & intima penetrans, vesicæ urinariæ tunicam offendit, adeoque erofit, ut ultra omnem expectationem, quodam mane, cum ulcus tractaretur, super linteola, & fila depositus, mirantibus mihi, & Chirurgo, & adstantibus observandus occurreret lapis compresse sphericus, asper, lineamentis fere insculptis humanam faciem quasi repræsentans, & magnitudine ovum gallinaceum parum superans. Minabatur porro partium destructionem, ipsamque ægrotantis mortem hæc suppuratio pessima, tam lata, tamque profunda. Attamen valida Corticis Peruviani, ab ipso etiam suppurationis initio ante exclusionem lapidis, & large, & diu a me præscripti vis gangrænam avertit, & post illum certe rarum lapidis egressum, ulcus, per quod lotium puri commixtum excernebatur, per plures adhuc hebdomadas Cortice numquam intermisso, abstersum denique, conglutinatum, occlusumque penitus est, lotio per naturales redeunte vias, convaluitque æger omnino.

XXXV. Homo nauticæ dicatus Arti annorum circiter 60. ab ebrio socio, hoc eodem anno, fauciatus est acuto latoque cultro infra hipocondrium sinistrum, & ilei cristam vulnere amplo profundo, ex quo magna facta est sanguinis effusio extra, atque intra abdominis cavitatem. In Nosocomio receptus exanimis extremum vitæ periculum jam subiturus videbatur.

Pe-



Peritissimus illum excepit, tractavitque Chirurgus Spadoni, atque me consulente modicæ ad tertiam usque reiteratæ fuerunt sanguinis emissiones, tenuissimo & raro æger enutritus cibo. Accensa est inde post dies aliquot ex suppuratione febris urens, & demum magna ex vulnere fœtidissimi puris copia educebatur, cooperante ad educationem puris solertissimi Chirurgi industria. Febris postmodum facta est lenta, consumens, pulsus exilis, celer. Itaque ad Corticis Peruviani anchoram confugiendum esse duxi, & exhibui ad drachmas usque duas pro dosi, repetita pluries primis diebus, minori dein, tandem semel in die. Hoc diu continuatum nobile remedium optatos sensibilibus effectus produxit. Melior observabatur puris indoles, quantitas quotidie minor: atque æger reviviscens laudabili fruebatur cibi appetentia, febris sensim sine sensu extincta, vulnus denique clausum est. Ast convalescens Nauta inopinato tentatur valido febrili frigore, calidissima deinde, & longe protracta febris. De nova suspicatus sum suppuratione, nec ideo remedium aliud præter regimen dieteticum, & diluentia præscripsi. Primam secunda, hanc tertia sequuta est febris; atque ista percurrente, per faciem, pectus, & brachia rubræ maculæ adparuerunt. Hæsitabam an novus hic morbus a reassumptione residui forsan in abdominis cavitate puris judicandus esset; an potius ab excitato variolarum fomite: confluebant enim variolæ per Civitatem, neque quinquagenarius æger se variolis affectum umquam fuisse recordabatur. Uno verbo in variolas conversæ pustulæ videbantur, & cursum, ut di-



secretæ quidem , sed copiosæ variolæ , morbus hic placide absolvit : ita ut præter regimen , & paucula pro re remedia , atque non omisso , moderatis certe dosibus , & post peractam suppurationem , Peruviano Cortice , facili negotio æger sanus evaserit , & bona fruens valitudine vivat pleno robore nauticis addictus laboribus .

XXXVI. Recentissimam historiam alteram lubet subjungere . Pauper juvenis annorum circiter 20. ad Nosocomium fuit delatus acutissima correptus febris . Rubicunda facies , pulsus duri , frequentes , mens obscurata , respiratio gravis , sanguinis exposcebant educationem , potiones nitratas , clysteres &c. , quibus non obstantibus peractis recurrebant febres sine manifesta periodo , more subcontinuarum , vel quasi continuarum . Confluentibus autem in Nosocomio febribus periodicis , Peruvianum antifebrile expurgatis primis , ut vocant , viis erat in opem revocandum . Resipuit revera tertio ab Corticis exhibitione die , moderata , non quidem victa , febris æger , qui de acuto dolore pollicis in sinistro pede querebatur , & retulit infectam in eo digito de vepreto spinam pluribus ab illinc diebus morbi causam fuisse . Digitus interim observatus enormiter tumens , rubens , & profunde jam suppuratus erat : quare ne obstarem suppurationi , cui Corticem resistere expertus scio , hujus dimissi usum , remque diluentibus , & peritæ Chirurgi manui commisi . Sed detumebat quidem de die in diem digitus , unde multum boni puris educebatur quotidie , dolor evanuit , nullo tamen ægrotantis levamine , nisi quod  
acu-



acuta in lentam, continuamque commutata est febris, atque æger ipse macie consumebatur, videbaturque fieri stupidus. Totum mox crus finixtrum dolens, tumens, contractum, immotum, nullo tamen rubore accensum observatum est. Suspicabar jam de puris reassumptione, parum enim puris de digito exprimebatur, qui tandem naturalem formam acquisivit, optimamque cicatricem duxit, crure adhuc dolente, contracto, tumente, immoto. Hæctica judicabatur consumi feбри juvenis miser, qui lectulo decumbens facibus, lotioque se exonerabat in lectulo. Igitur spes omnis mihi erat in Cortice Peruviano ad purulentam cacochimiam moderandam. Exhibui commixtis aliquot Caphuræ granulis. Aliquot elapsis diebus non se quidem melius habebat æger, sed morbo resistens stupiditatem amisit. Elapsa adhuc hebdomada dolore affectus est in dextera mamma, crure jam non amplius dolente extenso, & reddita mobilitate sano. Tumuit post paucos dies mamma affecta, & paucis inde diebus adeo crevit tumor mollis dolens, ut mamma videretur lactantis obesæ mulieris. Incisus tandem a Chirurgo tumor miram effudit puris quantitatem, *tenuis, atrii, fætidii*. Observanda hic obiter est reassumptio, seu evidens metasthasis puris de digito, crure finixtro ad dexteram mammam, & puris degeneratio in deterius: erat enim bonæ indolis in digito pedis, pessimæ in mamma. Dempta tum a Cortice Caphura, illum exhibere existimavi minori dosi, ter autem in die repetita. Pus adparuit minus atrum post plures dies; sed æger tussiebat frequenter, & expuebat purulenta, quod de pulmo-



monica læsione iudicium erat non dubium. Præter expectorantia, oximel simplex, & diluentia, iussi tunc sub alia forma administrari Corticem: huic enim commiscui radicis Glycirizzæ pulverem subdupla ratione ad Chinam, & tantillum Myrrhæ: quæ omnia cum syrupo Althææ simplici redacta in pilulas, harum quatuor vel quinque quotidie præscripsi, & haustum superbibendum potionis pectoralis. Pus deinceps densius, album, & quantitate de die in diem imminutum notabatur, tum quod de mamma exprimebatur, tum quod expuebatur tussiendo. Denique parum, & fere innocua expuebat, tussiebatque rarius, febrique extincta æger bona enutriebatur cibi appetentia, acquirebat vires, per Nosocomium valetudinarius ambulabat, ductaque in mamma cicatrice, sanus tandem dimissus est. Post 25. circiter diem ad Xenodochium rediit, initio nempe hujus, quo scribo, mensis Octobris; sed sano omnino pectore, febribus periodicis, iisque mitibus correptus, quibus iterum solis amaricantibus, & ventris blanda purgatione superatis, post 12. diem Nosocomium sanus reliquit.

XXXVII. Juvenem præ manibus habeo, dum hanc pariter scribebam Dissertatiunculam, qui tredecim circa ab hinc mensibus abscessum in sinistro rene passus minxit deinceps purulentam continuo urinam. Pus in matula depositum quantitate modo plus, modo minus, atque notæ nunc melioris, modo deterioris observatum variis temporibus fuit. Sed irritis quibusdam remediis, quibusdam neglectis, sub finem elapsi proxime Augusti, iterumque ultra idus Septembris, magnam



gnam cum lotio post prægressam acutam trium circiter dierum febrim, horridi puris foetidissimi copiam emisit. Viterbiensem acidulam, qua & usus alias fuit inutiliter, thermalem aquam denuo præscripsi afflicto juveni, sed pari successu. Ad Corticis Peruviani usum, quem Augusto mense jam exhibueram, deveni, nec sine fausto eventu. Pus inodorum, album, densiusculum excernebatur primo, mox minuebatur quantitate: nunc fere a pure omnino immunes observantur urinæ ita ut aliquid Terebinthinæ Venetæ jam nunc alternis diebus sumendæ sub pilularum forma existimaverim præscribere ad ulceratum viscus abstergendum penitus, ac solidandum, numquam tamen relicto Cortice, quo continuato, ac dein pro re moderando, mecum illustris æger, qui emaciatus debilisque primum, nunc meliori fruens corporis habitu, sperat, si D. O. M. concesserit, plenam renis sanationem.

XXXVIII. Alias nec paucas numero haberem huic proposito historias, quas ne longus nimium sim lubens prætereo; & aliquarum fortasse notandas circumstantias desiderarem, quæ memoria exciderunt. Interim nonne enarrata usque nunc ad evidentiam probant *validam, tutamque Corticis Peruviani efficaciam in puris, quovis in viscere sint, collectionibus?* Nonne affirmari potest omni procul erroris metu illud remedium puris indolem pravam in meliorem mutare? puris fluida liquantis, destruentisque solida effectus moderari? solida itaque, & fluida ita in elementorum nexu confirmare, ut dissolventi puri, purulento liquido volatili, acri Sali illi putridifero resistent? Uno

ver-



verbo ex observatis, experimentisque ille est porro Chinae Chinae effectus: *Animalium partium dissolutionem præpedire; inchoatam cohibere.*

Concludendum ergo nullum in materia medica notum esse remedium Peruviano Cortice præstantius, quo uti possint Medici, cum manifestum eis certo sit, collectionem puris adesse in quavis Corporis parte.

## ARTICULUS IX.

*Cautelæ in usu Corticis observandæ.*

XXXIX. **A**ttamen cum in tractando adeo gravi sanitatis negotio nihil sine cautelis sit operandum; animadvertendum ideo cum cura est, remedium, de quo agitur, suppurationibus resistere: sed suppurationes esse quandoque promovendas. Abstinentium ab usu Corticis, cum inflammatio adhuc in abscessibus vigeat conspicua: & vigere, collecto etiam pure, posse inflammationes ipse jam notavit Hippocrates, & Sydenamius (32), & observatur quotidie iis in casibus, ubi plurima sunt vasa inflammata obstructa, quæ amplum constituentia tumorem, maturari, ut medico loquar sermone, nequeunt omnia simul, unoque die. Indicant inflammationis præsentiam dolor, febris acuta, pulsus durus, urinæ flammæ, sitis &c., & in externis partibus tumor, rubor, dolor &c., ut patet medicam exercentibus praxim.

XL. Diathesis purulenta, emaciatio lente progrediens, febricula, post pastum exacerbans, pulsus hu-  
mi-

---

(32) Oper. omn. sect. 6. cap. 3.



miles, exiles, celeres &c. post prægressam visceris, seu partis alicujus inflammationem, de collecto pure indicia sunt, quæ mirabilis Chinæ Chinæ usum postulant.

XLI. Notavimus obiter (Artic. IV. num. 16.) *acidam* quandoque puris indolem. In lactantibus hoc præfertim pueris indubium est, in quibus nulla expectanda a Cortice Peruviano salus: quamvis enim puerulus lactea crusta affectus acescente pure undique scateat, & per visum & internis aurium, narium, aliarumque partium in abscessibus, obtusa tunc reperietur Corticis efficacia: acidum enim miasma elementares fibras compingit potius, corrugatque, non vero sejungit, solvit, destruitque, ut purulentum illud, quod alchalinum vocatur. Ubi vero acoris præsentia evanescit, prævalente putredine, seu alchalina purulentia, quæ suis peculiaribus conspicua notis fit, Corticis tum usus erit certe proficiuus.

XLII. Dosis denique, modus, continuatio in Cortice exhibendo, & quibus coadjuvari possit mediis, & quibus confirmanda valetudo sit post usum Corticis, ex consilio hæc pendent prudentis Medici, cui morbi, & ægrotantis circumstantiæ indicabunt. Nihil sane magis exitiale est Medicinam facientibus, quam generalibus præceptis mederi (33).

A R-

---

(33) Vix ulla perpetua præcepta medicinalis Ars recipit: A. Corn. Cels. in præfat.



# ARTICULORUM INDEX.

*Articulus*

- I. *Præloquium .*
- II. *Quid pus .*
- III. *Quibus causis pus efformetur .*
- IV. *Malæ puris qualitates .*
- V. *Horridi purulentæ materiæ effectus .*
- VI. *Quæ puri obsistant remedia .*
- VII. *Cortex Peruvianus puris causis obsistit ,  
atque effectibus .*
- VIII. *Comprobatur observationibus in morbis  
ex pure , Cortice superatis .*
- IX. *Cautelæ in usu Corticis observandæ .*

FINIS.



BIP



